

Pariz: Visoki predstavnik posjetio Ministarstvo vanjskih poslova Francuske



Visoki predstavnik Valentin Inzko sastao se u Parizu sa Nicolasom Delacosteom, zamjenikom direktora za kontinentalnu Evropu pri Ministarstvu za Evropu i vanjske poslove Francuske, kako bi razgovarali o najnovijem razvoju političke situacije u Bosni i Hercegovini.

Visoki predstavnik je podvukao štetnost posljedica koje nastaju po stabilnost i prosperitet BiH zbog stalnog osporavanja ustavnog i pravnog poretka zemlje, nepoštivanja vladavine prava generalno, a posebno presuda Ustavnog suda te politike koja se bavi prošlošću. "Ukoliko Bosna i Hercegovina želi ispuniti svoja obećanja i postati istinski demokratska i razvijena zemlja, treba ponovo utvrditi svoje prioritete i uložiti više napora u reforme koje će ovu zemlju povesti naprijed umjesto fokusiranja na pitanja koja je neprekidno drže u prošlosti", rekao je visoki predstavnik.

Zahvaljujući se zamjeniku direktora Delacosteu na doprinosu njegove zemlje i na ulaganju napora za dobrobit Bosne i Hercegovine i njenih građana, visoki predstavnik Inzko je naglasio važnost jedinstva međunarodne zajednice i njene odlučnosti u nastojanjima da se postigne trajan mir i stabilnost u BiH.